

գալուն՝ Յոպպէի առջև ծովը կ'իյնայ քովը գտնուած ձեռագիր Աւետարանին հետ, բայց կ'ազատուի և անունը կը դրուի Ծովածին: Եղթայակիրի վերջին աշակերտներէն էր և անոր վերջին տարիներուն կ'ընտրուի Առ. Եգիպտոսի. կը ձեռնադրուի եպս. 1762ին. և նւ. Տիրանակերտի. ՓԿԵ. (1764-1775). ՊԵ. (1775-՝ 1793). 1792 ին կը թղթակցի Վրաց Հերակլ Բ. կայսեր հետ (Սաւալան. էջ 961-972): Յովակիմ պտրք. իր ծախքով 1787 ին Պոլսի մէջ տպագրել կուտայ Ս. պատարագի Խորհրդատեսը. իր տապանագիրը՝ հետեւեալն է՝ զոր ինք գրած է.

«Այս է տապան հանգստեան

Յորժամ յայտնի նշան տէրունեան.

Զի մի՛ դարձցի տնանկն ամաչեցեալ.

Որ եմ ի ներքոյ վիմիս թաքուցեալ

Յովակիմ պատրիարք յորջորջեալ

Եւ Ծովածին կոչեցեալ.

Չեռամբ իմով շարադրեալ.

Առ Տէր Յիսուս գընացեալ.

Ի թուին ՌՄԽԲ (=1793), և Սեպ. ԻՆ»:

ՅՈՎԱԿԻՄ ՎՐԴ.— Մբ. ՄՁ. Թ. 23 ձեռագիրին յիշատակարանին համաձայն Յովակիմ վրդ. 1743ին տեսուչ կարգուած է Ռամլէի վանքին: Յիշատակարանն է հետեւեալը. «Ես մեղապարտ Յովակիմ վրդ. եկի այս Ս. Գէորգայ ամենագեղեցիկ վանքս առաջնորդ յոհիզ հրամանաւ Սրբազան վեհին մերոյ Տեառն Յակոբայ իմաստնոգարդ և գերընտիր պատրիարքին. թվին ՌՃԴԲ (=1743) ամին, ապրիլի ի. օրն». (Խապ. Յուգ. էջ 15):

ՅՈՎԱԿԻՄ ՎՐԴ.— Մբ. 1793ին ՏՅ.:

ՅՈՎՀԱՆՆԷՍ ԱԲ.— Մբ. 1215ին երուսաղէմի մէջ կ'ընդօրինակէ ճառընկիր մը. Յովհաննէս ճգնաւորին համար. նոյն ձեռագիրին յիշատակարանին կարևոր մասերը կ'ընդօրինակենք հոս. «Յամի վեց հարիւրորդի վաթսընեորդի եւ չորրորդի ամի շրջաբերութեան հայոց տումարի (=1215) եւ ի թագաւորութեան հայոց Լեոնի, ի վերջացեալ և ի նըուագեալ գառն ժամանակի, յաւուրս աստուածապատիւ և հոգևոր տեառն Յովհաննէսի Հայոց կաթողիկոսի. յաշխարհս Պա-